

Ineqarnermut Attaveqarnermullu Pisortaqarfik

Direktoratet for Boliger og Infrastruktur

Ilisimatitsissut Notat

Uunga Jørgen Wæver Johansen
Til

20.10.2006
J.nr. 37.01.02

Assinga uunga DOJ, JUOL, OPN
Kopi til

Postboks 909
3900 Nuuk
Oq/tel +299 34 54 00
Fax +299 34 54 10
iap@gh.gl
www.nanoq.gl/iap

Attaveqatigiinnermut Ineqarnermullu Ataatsimiititaliamik isumasioqatigiilluni ataatsimeeqateqarneq

Siunnersuut UKA2006/45, Inissianik attartortitsisarneq pillugu Inatsisartut peqqussutissaattut siunnersuutip suliarineqarneranut atatillugu Ataatsimiititaliap apeqqutit tulluuttut oqallisiginissaat kissaatigaa:

1. Namminersornerullutik Oqartussat iluarsaassinermi kinguaattoorutaasa 2 milliardit kroningajannvorsimanerannut suna tunuliaqutaava?

Ulloq 1. januar 1987 Danskit Naalagaaffiannit ineqarneq Namminersornerullutik Oqartussat tiguaat. Nuussinissap tungaanut Naalagaaffiup inissiaatai ingerlatsinissamik Naalagaaffimmut isumaqatigiissut naapertorlugu nunatsinni kommuninit aqunneqarput, attartortinneqarlutik, ingerlanneqarlutik aserfallatsaaliorneqarlutillu.

Inissiat Naalagaaffimmit tiguneqarneranni inissiat kommuninit aqunneqarnerat ingerlaannarsimavoq, tamatumuuna Namminersornerullutik Oqartussat sinnerlugit. Aatsaat 1995-imi januarip aallaqqaataanni inissiat aqunneqarnerat A/S Inissiaatileqatigiiffik INI-mut Namminersornerullutik Oqartussat tunniuppaat.

1960´kkunniit 1990´kkut naalernerannut Naalagaaffiup inissiaataasa sanaartorneqarnerisa nalaani siunissami aserfallatsaaliuinissanut iluarsaassinissanullu annertunernut aningaasanik atugassanik naatsorsuisoqartarsimangilaq, akiliisitsisoqartarsimanani illuartitsisoqartarsimananiluunniit.

Allatut oqaatigalugu piffissami tassani aningaasatigut nammagassat annertusiartuinnarsimapput, taakku 2000-imi 2,1 mia. kr.-inut missiliorneqarlutik. Tassunga akiliisitsisoqartarsimanginnera attartortunut 1960´kkunniit 1990´kkut

naalernerannut annikippallaamik ineqarnermut akiliuteqartarsimasunut soorunami iluaqutaasimavoq. Akerlianilli maannakkut attartortut tamatuma kingunerisaanik pillarneqarput.

2. Iluarsaassinermi kinguaattooritit tamakkiisut ilaasaluunniit attartortunit aningaasalersorneqarnissaat § 1, nr. 8-mi aalajangersagaq aqqutigalugu Naalakkersuisut siunertaraat?

Aap, kisiannili iluarsassinermi kinguaattooritit piffissap sivilunerusup ingerlanerani aningaasalersorneqassapput. Maannakkut Aningaasanut Inatsimmi iluarsaassinissanut ukiumut 65 mio. kr.-nit missaanni immikkoortitsisoqarpoq. Aningaasat amerlassusaat Namminersornerullutik Oqartussat ukiumut aningaasaliissutinit iluanaarutinit tigusartagaannut naapertuutikannerput. Peqatigisaanik Namminersornerullutik Oqartussat inissiaarsuaataannik isaterinissanik, taakkunungalugu taarsiullugu nutaanik inissialiortiternissanik, soorlu piginneqatigiilluni inissianik, periarfissanik nalillersuinerit ingerlanneqarput. Tamatumuuna Namminersornerullutik Oqartussat iluarsaassinissamut nammatassai annikillisussaapput.

Nuummi Blok Q, R & S-ip isaterneqarnissaat tamatumunnga assersuutissaalluarpoq. Tamatumunnga assingusumik Paamiut taamatullu Qaqortup kommuunii pitsaasumik isumaqatiginninniarfigineqarput. Aammattaaq Nuummi Tuujummi inissiat aserfallassimaqisut pillugit Nuup Kommuneanik oqaloqatiginninnerit ingerlanneqarput.

Aammattaarli aalajangersakkami allassimavoq aningaasanut inatsimmi ukiukkaartumi oqaasertaliussinikkut akiliutissap annertussusissaa aalajangersarneqartassasoq, taamaalilluni akiliutissap annertussusissaa pillugu Inatsisartut ukiut tamaasa inaarutaasumik aalajangiisussaataapput.

Kiisalu ilisimatitsissutigisinnaavara kvadratmeterimut ukiumut 2 kronenik amerlassusilinnik 2008-imi akiliuteqartitsisoqassasoq Naalakkersuisut takorluuimmata. Namminersornerullutik Oqartussat inissianik attartortittakkanik 525.000 kvadratmeterit missaanniittunik pigisaqarmata namminersornerullutik oqartussat inissiaataanni attartortittakkani ukiumut 1 million kronerluinnangajaassapput.

3. iluarsaassinissamik pisariaqartitat tamakkiisut ukiumut 120 mio. kr.-inik annertussuseqartut attartortunut tutsinneqarpata, tamanna inimut akiliummut qanoq sunniuteqassava?

Ineqarnermut akiliutit annertooujussuarmik aammalu Naalakkersuisut akuerisinnaasaannit annertunerungaatsiartumik qaffassapput.

4. Iluarsaassinermut atatillugu aningaasartuutit attartortunut tutsinneqassanngippata iluarsaassinermi kinguaattooritit iluarsiiqqineqarnissaannut Naalakkersuisut isiginninnerat malillugu periarfissat allat aalajangersimasut suuppat?

Iluarsaassinermi kinguaattoorutit aaqqiiviginarlugit periarfissat allat marluk Naalakkersuisut tikkuarsinnaavaat:

Siullermik attartortunut tamanut assigiimmik akiliuteqartitsinerulernikkut ataatsimut isigalugu ineqarnermut akiliutit qaffanneqarsinnaapput, taamaalillutik attartortut nutaani taamatullu qanganisaanerusuni ineqartut iluarsaassisimanginnermut aserfallatsaaliisimanginnermullu akileeqaataasalersillugit. Ineqarnermut akiliutit qaffaataannut akiliutinit iluarsaassinermi kinguaattoorutitut aningaasartuutit akilerneqartarput.

Ineqarnermut suliassa qarfiup namminersortunngorsarneqarnissaa allatut iliornikkut aaqqiissutissatut isumaliutigineqarsinnaavoq, taamaalillutik iluarsaassinissat annertuut realkredit atorlugu taarsigassarsinikkut aningaasalersorneqarsinnaassagaluarput. Taamaaliornikkut aningaasartuutigineqartussat assersuutigalugu ukiunut aggersunut 30-inut siammarneqarsinnaassagaluarput.

Kiisalu aamma iliuuseqanngilluinnartoqarsinnaavoq.

5. § 1, nr. 4-imi maalaarsinnaanermut killiliinerup inissat pillugit maalaarutitut atatilugu innuttaasut inatsisitigut illersugaanerit annikillissippaa?

Naamik. Akerlianik maalaarsinnaanermut killiliineq isigineqassaaq attartortut inatsisitigut illersugaasut, pissutigalugu Ineqarneq pillugu Maalaaruteqartarfiup aalajangiisinnaatitaaffiisa iluanni attartortut Ineqarneq pillugu Maalaaruteqartarfiup maalaarutiminnik suliaqarsinnaammata. Ineqarneq pillugu Maalaaruteqartarfik siulittaasoqarpoq aammalu attartortitsisunit attartortullu aallartitaannit ilaasortaaffigineqarluni, taamaalilluni attartortut maalaarutaannik toqqissisimanartumik suliaqarnissaaq tunngavissaqarluni.

Naggataatigut erseqqissaatigissavara siunnersuummi § 1, nr. 8-imi akiliutissaaq pillugu aalajangersakkami taaneqartumi siunertaammat ineqartut pitsaasunik toqqissisimanartunillu najugaqarnissaaq. Iluarsaassinerinnakkut, tassalu matut igalaallu aserfallassimasut taarsernerinnaasigut, pitsaasunik toqqissisimanartunillu najugaqalersitsisoqarnaviannigilaq. Najukkat pitsaasut toqqissisimanartullu aamma pilersinneqarsinnaapput pitsaanagerusumik inuuneqalernissamat tunngavissisunik avatangiiseqalersitsinikkut. Akiliutissamik aalajangersaanermi tamanna isumaavoq. Matut igalaallu aserfallassimasut taarserneqarsinnaapput aammalu attartortut inooqataanermikkut atugaat najukkaminnilu avatangiisaat iluarsaanneqarsinnaapput. Nuummi Blok T-mi misilittakkat takutippaat matut igalaallu aserfallassimasut taarserneri immiini naammangitsoq. Taamaattumik Namminersornerullutik Oqartussat inissiaataanni inooqataanermi atukkanut iluarsaassinissamik siunnerfeqarluta akiliuteqartitsinissaaq pisariaqartipparput.